

欽
定
全
唐
文

欽定全唐文卷三百四十一目錄

新文藝出版社藏書

顏真卿 六

祕書省著作郎夔州都督長史上護軍顏公神道
碑

朝議大夫守華州刺史上柱國贈祕書監顏君神
道碑銘

正議大夫行國子司業上柱國金鄉縣開國男顏
府君神道碑銘

左衛率府兵曹參軍賜紫金魚袋顏君神道碑銘

朝請大夫行江陵少尹兼侍御史荆南行軍司馬
上柱國顏君神道碑銘

攝常山郡太守衛尉卿兼御史中丞贈太子太保
諡忠節京兆顏公神道碑銘

河南府參軍贈祕書丞郭君神道碑銘

欽定全唐文卷三百四十一

顏真卿 六

祕書省著作郎夔州都督長史上護軍顏公神道
碑

君諱勤禮字敬琅瑯臨沂人高祖諱見遠齊御史中丞梁武帝受禪不食數日一慟而絕事見梁齊周書曾祖諱協梁湘東王記室參軍文學有傳祖諱之推北齊給事黃門侍郎隋東宮學士齊書有傳始自南入北今爲京兆長安人父諱思魯博學善屬文尤工詁訓仕隋司經局校書東

宮學士長寧王侍讀與沛國劉臻辯論經義臻屢屈焉學
書黃門傳集序君自作後加踰岷將軍太宗爲秦王精選
僚屬拜記室參軍加儀同娶御正中大夫殷英童女英童
集呼顏郎是也更唱者二十餘首溫大雅傳云初君在隋
與大雅俱仕東宮弟愍楚與彥博同直內史省愍楚弟遊
秦與彥將俱典祕閣二家兄弟各爲一時人物之選少時
學業顏氏爲優其後職位溫氏爲盛事具國史君幼而朗
悟識量宏遠工於篆籀尤精詁訓祕閣司經史籍多所刊
定義寧元年十一月從太宗平京城授朝散大夫勳解褐

祕書省校書郎武德中授右領左右府鎧曹參軍九年十一月授輕車都尉兼直祕書省貞觀三年六月兼行雍州參軍事六年七月授佐郎七年六月授詹事主簿轉太子直監加崇賢館學士官廢出補蔣王文學宏文館學士永徽元年三月制曰君學藝優敏宜加獎擢乃拜陳王屬學士如故遷曹王友無何拜祕書省著作郎君與兄祕書監師古禮部侍郎相時齊名祕監與君同時爲崇賢宏文館學士禮部爲天策府學士弟太子通事舍人育德又奉令於司經局校定經史太宗嘗圖畫崇賢諸文學士命祕監

爲讚以君祕監兄弟不宜相褻述乃命中書舍人蕭鈞特
讚君曰依仁服義懷文守一履道自居下帷終日德彰素
里行成蘭室鶴鑰馳譽龍樓委質當代榮之六年以後夫
人兄中書令柳奭親累貶夔州都督府長史顯慶六年加
上護軍君安時處順恬無愠色不幸遇疾傾逝於府之官
舍旣而歸窆於京城東南萬年縣寧安鄉之鳳栖原先夫
人陳郡殷氏泉柳夫人同合祔焉禮也七子昭甫晉王曹
王侍讀贈華州刺史事具真卿所撰神道碑敬仲吏部郎
中事具劉子元神道碑殆庶無恤辟非少連務滋皆有學

行以柳令外甥不得仕進孫元孫舉進士考功員外劉奇
特標榜之名動海內從調以書判入高等者三累遷太子
舍人屬元宗監國專掌令盡除沂濠三州刺史贈祕書監
惟貞頻以書判入高等歷畿赤尉丞太子文學薛王友贈
國子祭酒太子少保德業具陸據神道碑會宗襄州參軍
考楚州司馬澄左衛翊衛潤倜儻涪城尉曾孫春卿工詞
翰有風義明經拔萃犀浦蜀二縣尉故相國蘇頲舉茂才
又爲張敬忠劔南節度判官偃師丞杲卿忠烈有清識吏
幹累遷太常丞攝常山太守殺逆賊安祿山將李欽湊開

土門擒其心手何千年高邈遷衛尉卿兼御史中丞城守
陷賊東京遇害楚毒慘下詈言不絕贈太子太保諡曰忠
節曜卿工詩書草隸十六以詞學直崇文館淄川司馬旭
卿善草允山令茂曾訥言敏行頗工篆籀犍爲司馬闕疑
仁孝善詩春秋杭州參軍允南工詩人皆諷誦之善草隸
書判頻入等第歷左補闕殿中侍御史三爲郎官國子司
業金鄉男喬卿仁厚有吏材富平尉眞長耿介舉明經幼
興敦雅蘊藉通班漢書左清道率府兵曹眞卿舉進士校
書郎舉文詞秀逸醴泉尉黜陟使王鉷以清白名聞七爲

憲官九爲省官洊爲節度採訪觀察使魯郡公允臧敦實
有吏能舉縣令宰延昌四爲御史充太尉郭子儀判官江
陵少尹荆南行軍司馬長卿晉卿邠充國質多無祿早世
名卿侑侑伋倫並爲武官元孫絃通義尉沒於蠻泉明孝
義有吏道又開土門佐其謀彭州司馬威明邛州司馬季
明子幹沛翊泉明男誕及君外曾孫沈盈盧逖並爲逆賊
所害俱蒙贈五品京官濬好屬文翹華正頌並早天穎好
五言校書郎頌仁孝方正明經大理司直充張萬頃嶺南
營田判官頌鳳翔參軍頌通悟頌善隸書太子洗馬鄭王

府司馬並不幸短命通明好屬文項城尉翽溫江丞覲縣
州參軍覲鹽亭尉顥仁和有政理蓬州長史慈明仁順幹
盡都水使者顥介直河南府法曹顥奉禮郎顥江陵參軍
顥當陽主簿顥河中參軍項衛尉主簿顥左千牛顥顥並
京兆參軍顥顥並童稚未仕自黃門御正至君父叔兄
弟衆子姪揚庭益期昭甫強學十三人四世爲學士侍讀
事見柳芳續卓絕殷寅著姓略少監少保以德行詞翰爲
天下所推春卿杲卿曜卿允南而下泉君之羣從光庭千
里康成希莊日損隱朝匡朝昇庠恭敏鄰幾元淑敏溫之

舒說順勝怡渾允濟挺式宣韶等多以名德著述學業文
翰交映儒林故當代謂之學家非夫君之積德累仁貽謀
有則何以流光末裔錫美盛時小子真卿聿修是忝嬰孩
集慕不及過庭之訓晚暮論譔莫追長老之口故君之德
美多恨闕遺銘曰

闕銘

朝議大夫守華州刺史上柱國贈祕書監顏君神
道碑銘

君諱元孫字聿修京兆長安人高祖諱之推北齊給事黃
門侍郎待詔文林館曾祖諱思魯隋太子校書東宮學士

皇朝秦王記室祖諱勤禮著作郎崇賢宏文兩館學士父
諱昭甫高宗侍讀曹王屬贈華州刺史俱以德業才名相
望史用君卽華州之元子少孤養於舅殷仲容家身長六
尺二寸聰銳絕倫工詞賦章奏有史才明吏事年十歲時
叔父吏部郎中敬仲任益府法曹長史李孝逸聞君少俊
請與相見座中試安石榴賦君默綴少頃郎中聘而從之
君授翰立就不加點竄孝逸大驚尤善草隸仲容以能書
爲天下所宗人造請者牋盈几輒令代遣得者欣然莫之
能辨舉進士素未習尚書六日而兼注必究省試九河銘

高松賦故事舉人就試朝官畢集考功郎劉奇乃先標榜
君曰銘賦二首既麗且新時務五條詞高理贍惜其帖經
通六所以不

原本
闕

屈從常第徒淡悚忤由是名動天下解

褐鼓城主簿歷登封尉與弟贈太子少保諱惟貞府君調
選屢以高等同登甲科相代爲長安尉翰林偉之前是老
吏好以婚田之不決者試新上官君悉堦階上研墨汁數

原本
闕

操割凡百餘道不終夕而畢縣令隴西李綰才學士

也覩

原本
闕

駭命小吏分手寫之而通不給朝廷聳歎遷洛

陽丞著作佐郎太子舍人時元宗監國獨掌令誥當時以

爲綸言之最嘗有命召或以次進

原本闕

今日非也聞公喚

長舍人來遂御小殿賜食因出諸家書跡數十卷曰聞公

能書可爲寡人定其真僞君分別以進上元宗大悅因賜

藤牋筆墨衣服等物嘗和遊苑詩御札八分批答云孔門

入室魯國稱賢翰墨之妙莫之與先君一覽無遺兼該故

實韋安石以宰相兼庶子特相禮重宮務一以諮君事頗

填委從駕至

原本闕

以司直用事命坊官同遊石瓮寺駐焉

諸君有忌前者曰顏舍人必不行已而君辭以遽曰果爾

何爲妄請君默然元宗登極同列皆遷中書舍人君讓范

陽盧備俄爲琚等所擠出爲潤州長史遷滁州刺史按察使王志愔以清白名聞拜沂州志愔娶於顏餘慶以男求婚君拒之遂誣奏請降階奪祿其初君與執事者因官有忤至是憾焉遂黜歸田里君屏私第傲然無悶者十年與陳郡殷踐猷上谷寇泚武功蘇晉吳郡陸象先友善相見未嘗不畢景起爲濠州刺史累加朝議大夫上柱國中書令張嘉貞浚相器重方引知制誥原本右職屬罷相不行代到風疾停家開元二十年秋七月才生明薨於絳州翼城縣丞之官舍隨子春卿任也明年葬於東京鵠店

東北高村原夫人新城縣君元氏故兆異穴而塋權也文集三十卷著于祿字書一卷並行於世續祖父涉今光庭注後漢書常山之陷也沒焉廣德二年春三月二十有二日制曰故濠州刺史上柱國顏元孫懿道淳茂宏材特達傳經成業聚學爲文清白著於家風問望光於銓選久膺揚歷爰寄藩條政有其方績宣其用未登大任遽迫流年九原不作郡邑存其遺愛二子象賢艱難立其名節忠能徇國孝在榮親贈以儒官揚其盛烈可贈祕書監眞卿表謝今上批答云卿之先伯當代詞宗道蘊國經行推人表

上宏祖德下獎門閥鄭國不亡臧氏有後雖雲雨之澤自
葉流根然訓誨之方因父見子永惟盛烈式寵代官不朽
者名斯爲極矣嗚呼君有五子皆有才名春卿聰銳無比
早擅詞賦尤工表檄倜儻有吏能急人之急明經拔萃歷
蜀縣尉長史蘇頌舉茂才異等未試充張敬忠節度判官
轉翼城丞與弟杲卿曜卿從父弟允南調選同日於銓庭
爲侍郎席建侯所賞授偃師縣丞杲卿忠烈方正精敏有
識累至魏州錄事參軍清白名聞充安祿山營田及度支
判官太常丞攝常山太守祿山反誅其土門使及

原本
闕拜

衛尉卿兼御史中丞城陷詢詈爲賊所屠宰乾元中贈太子太保諡曰忠節曜卿介直以信稱勤學好屬文工草隸書十五以文學直崇文館每選集必爲主司所賞擢歷城丞淄川司馬旭卿美姿儀善草書允山令茂曾仁恕和厚口無擇言頗屬文詞留心詁訓嘉陵司馬孫紘少好雜書疎財重義方義尉鮮于仲通節度劔南引爲判官同征閬羅鳳沒於蠻泉明穎悟孝義果銳嫻於吏道安平尉父敬保將開土門使與長史袁履謙往來謀議授左金吾兵曹尋爲賊所執舉家見陷泉明到河北乞求贖先姑女而後

已子行路哀之東京收復泣血求父屍獲焉時人以爲孝
威所致拜郫令有能名爲崔光遠所擠終彭州司馬威明
太僕丞邛州司馬季明惇敏有容止與君外孫盧遜同爲
賊所害贈左贊善濬勤學好屬文早卒子幹剛銳強力公
劉府果毅弟沛同遇賊害贈都水使者沛尚食奉御翹入
道詔與泉明子誕同質於祿山皆被鋸殺贈贊善誕義王
諮議翹道義令覲漢州參軍覲鹽亭尉翹未仕曾孫証
右內倉曹訊兵曹詔彭王參軍皆承謀翼不敢失墜惟君
德盛才茂行周業廣文可以經國道可以致君而坎壈盛

明不登弼亮其時歟其命歟真卿越自嬰孩特蒙獎異且兼師父之訓豈獨猶子之恩濡筆告哀不申萬一銘曰

琅琅世父明德是矩孝以仁親忠期輔主周旋禮法精究訓詁行楸珪璋文彪龍虎高標天府震耀區寓前載

原本闕

千官歟親王畿就列赤縣斯偃杖華交輝灑翰如雨洛陽

毗貳著作布武載筆龍樓

闕一字

光龜組元宗褒異

闕一字發

儔伍不入掖垣翻飛江潯淮沂其乂典憲斯侮望聞爰歸優游不吐名公虛左濠上爰撫方俟同昇遽愆多祐一麾屢黜百贖奚補翼子多方教忠則臚吁嗟太保爲國干櫓

取義舍生悲今邁古皇恩自葉超贈祕府存歿哀榮幽明
赫昉真卿追痛銜恤靡怙牽綴銘功恨非覲縷

正議大夫行國子司業上柱國金鄉縣開國男顏
府君神道碑銘

君諱允南字去惑京兆長安人也高宗侍讀贈華州刺史
昭甫府君之孫薛王友贈太子少保惟貞府君之第二子
也少以詞藻擅名兼工草隸書尤善五言詩浚爲伯父濠
州刺史元孫府君之所賞愛開元十五年以挽郎選糊名
考判入高第授鶡觚尉後與從父兄春卿杲卿曜卿調集

皆爲吏部侍郎席建侯所賞重時論榮之尋授右武衛兵曹二十六年丁內憂以毀聞服闋轉右領軍錄事參軍與從祖姑子劉同昇齊名長又相善嘗寓書與之中書舍人孫逖見而驚歎曰古人之作尋爲同昇江南經略判官遷大理評事從調吏部侍郎達奚珣以書判超等薦爲朝廷左補闕元宗嘗撰華嶽碑並書天寶九載令御史大夫王鉷打百本以賜朝臣家獲二本者四族而君以兩省官弟真卿以殿中侍御史居其一焉每正至朝賀宰相以下登殿者不過三十人而君與真卿王鉷法服於含元殿蹈舞

而衣接焉朝覲宴集必同行列故君賦詩云誰言百人會
兄弟皆霑陪與諫議大夫鄭審郎中祁賢之每應制及朝
廷唱和必警絕佳對人人稱說之俄遷殿中侍御史以忤
楊國忠貶襄陽丞移河東司戶京兆士曹十五年長安陷
興駕幸蜀朝官多出駱谷至興道房琯李煜高適等數十
人盡在中丞田良邱爲哥舒翰行軍司馬旣敗猶自振矜
因誦表云翰北行師未當挫衄蓋緣運數潛迫人神同棄
職之人故匪翰之由衆皆默然君獨抗聲叱之曰公何得
尚爲賊說微祥乎烜等因欲毆擊魏仲犀與之同罪遜詞

引去不敢枝梧一座皆壯之恩詔召拜尚書屯田員外郎
加朝散大夫遷司膳郎中真卿至自河北元宗給君驛至
鳳翔令相見從肅宗入西京遷司封真卿以尚書兼大夫
弟允臧又爲殿中兄弟三人同時臺省當代無比時人欽
羨焉尋封金鄉縣開國男累加正議大夫上柱國遷國子
司業寶應元年冬十一月真卿自利州蒙召至上都君遇
疾已革闕而泣曰吾忍得見汝因哽咽不自勝其十日傾
逝於私第享年六十九嗚呼明日庚申葬於萬年縣鳳棲
原先塋之北祔也二子穎頻皆好爲五言詩真卿使奏事

彭原上文章蒙擢校書郎早卒穎簡直潔已以左衛兵曹
選爲侍郎崔器所賞累授河南府士曹噫君幼而聰明長
而美秀仁恕形於造次清識冠於當時善與人交篤於僚
友故父執侍郎寇公泚相國陸公象先尚書陸公景融重
君才名相見未嘗不移日也相國房琯尚書韋陟張倚皆
篤忘年之契河南陸據彭城劉餗劉秩隴西李揆河東裴
士淹特敦莫逆之歡河東敬括隴西李華李涵范陽盧允
畢盡常僚之好非夫親仁誠物泛愛虛已則何以廣而能
周久而益敬者矣家常有折脛鶴初真卿小年時戲書其

背君切責曰此雖不能奮飛竟不惜其毛羽奚不仁之甚
歟其惻隱者如此真卿終身志之於戲以君之才之美之
德之義方當翼亮盛時儀型宗國道之祝喪頓我遠圖悲
乎痛哉真卿孩而不夭太夫人蘭陵郡太夫人殷氏親自
鞠育實賴慈訓粗茲有成至若發慮學文之親立身復禮
之道非仁兄之規誨曷暨所蒙且有師訓之資豈惟孔懷
之戚布哀金石未究萬分銘曰

莊嶽熊渾清沂駿奔英靈孕育生我仲昆維我仲昆邦家
之藩孝仁是履愷悌是惇清識冰澈韶儀玉溫詞華藻綯

翰墨雲繁通究理體精詳政源爰初發迹屢振瑤琨尉邑
何陋評廷不冤袞衣補闕繡服榮敦神州列掾會府掌屯
司膳王封迴薄飛騫乃佐教胄載光儒門未登鼎鼐奄謝
鴻駕伊昔不造實賴能存下光花萼上潔晨飧微君教導
曷惠拯援今旣絕矣哀摧忍言何以寘懷勒銘弗諼垂諸
來裔翼子謀孫

左衛率府兵曹參軍賜紫金魚袋顏君神道碑銘
君諱幼輿字令軌京兆長安人高宗侍讀贈華州刺史昭
甫府君之孫薛王友贈太子少保惟貞府君之第六子也

美容止有器度故小名榮焉孝悌仁和精詳禮法博涉史記漢書盡究其義理起家后土齋郎調補汝南郡新息縣主簿恪謹官次備聞修潔紀綱吏人罔弗畏慕太守趙國公王琚器君才名待以殊禮縣之庶務悉以見咨家素清貧從母之孀嫠者宗族之惇單者皆仰給焉君悉心奉養情禮彌篤哥舒之攻石堡城請君隨軍拜左衛率府兵曹參軍恩敕賜緋魚袋不幸以天寶九載秋七月旬有三日遇疾而終春秋四十八卽以其月寔於萬年縣鳳棲原先塋西北祔也夫人陳郡殷氏太夫人蘭陵郡太夫人充曹

州司法麗正殿學士踐猷之元女高士永寧尉寅之女弟
高士壽安尉亮之家姑也我伯舅聰明純粹博學稽古相
國陸象先祕書監賀知章臬我世父濠州刺史元孫府君
友善皆呼爲五總龜千年而五總問無不知也太夫人以
君四世殷之自出原本失其新命君娶之旣而遂焉成先
志也夫人含風孤映當世以廣德三年冬十月二十一日
棄牀帳於江陵仲子鳳翔參軍顓臾季子頓不幸早夭大
厯四年夏四月壬戌季弟眞卿命君孟子前武功丞頂叔
子左千牛願度遠日而合祔焉嗚呼君以全德之姿丁休

明之運宜其振翼層漢濯鱗清流而位不準才德淪於天
吁足慟也謂之何哉銘曰

兵曹樂只於穆不已華州之孫少保之子溫溫體度嶷嶷
容止非禮勿言唯德是揆人倫領袖宗廟簠簋佩服典常
顓精文史汾睢歲事新息入仕忠益上官總持綱紀奉養
從母必窮珍旨綏族紂宗羣居咸喜哥舒授律石堡俟倚
命我翊戎寵章斯被鯤溟未運鴻漸伊始不與之年云如
何瘞安放安仰嗣徽昭美合葬既遵從周有斐于嗟窘束
不獲躬視寫恨立銘告哀于祀

朝請大夫行江陵少尹兼侍御史荆南行軍司馬

上柱國顏君神道碑銘

君諱允臧字季寧京兆長安人曹王晉王侍讀贈華州刺史昭甫府君之孫薛王友贈太子少保惟貞府君之第八子也孝悌惇敏有才幹局力所居以吏道稱解褐太康尉太守張倚採訪使韋陟皆器其清嚴與之均禮天寶十載制舉縣令對策及第授延昌令君悉心致理遠者懷而邇者安採訪判官賈至王倫言於使清白名聞會安祿山反遂止潼關陷太守李揖計未有所出君勸投靈武至寧朔

屬同羅招六蕃府絕不得通肅宗聞君誠至德初追赴彭
原行在所拜監察御史賜緋魚袋遂承任使推劾不避強
禦中官邢延恩等皆得罪焉尋充朔方兵健衣資使郭公
子儀請爲判官清渠之刎也賊兵四合矢下如雨君挺劒
躍馬奔之得出至武功知縣御史及吏人無敢住足君徐
坐示暇於大達然後少有至者因令具頓以候今上上大
驚喜引之同食河東人郭俊邢韶翻城歸順郭公俾君先
入郡以安恤之郭公旣至軍郡之事一以咨君隨方決遣
無不欣愜有郡人嘗爲賊將崔乾祐判官郭公欲加刑君

領證左右以入救遂貰之二年秋八月遷殿中侍御史眞卿表謝肅宗批答曰卿昆季連擢才聲並振俱守寒松之操允執後彫之心久冒艱危大知難奪委以憲臺之長克申白簡之威厥弟之遷亦爲官擇宜相勸勉各樹能名當代榮之京城收與崔祿銜命宣撫都人大悅出爲櫟陽令錄事有奸犯者君立榜殺之豪強震恐一縣屏息遷侍御史以當爲郎以兄在南省君遂撝揖牢讓轉大理正用法精詳或以賄財執事而妄訴者卿丞莫能止君獨召訊詰責立服衆皆爲君危之寶應中復拜侍御史兼太子中允

廣德三年冬十月拜江陵少尹又兼侍御史荆南行軍司馬君清正卓立特爲軍州所敬旣而代到屢詔徵入未得行大歷三年冬十一月五日乙亥奄忽感暴疾終於私第春秋五十九其兄真卿聞喪哀摧甚去手足迺命姪男前武功丞頂諗於其妻奉明縣君韋氏其孤前京兆參軍潁泉潁禹等以明年夏四月壬戌歸祔君於上都萬年縣鳳棲原先塋之北禮也嗚呼君姿質瓌博襟靈沈粹心根德義躬服孝仁理以居家果於從政與人淡一定之分臨事多獨見之明屢佐戎旃必聞忠益六登憲府皆推直諒信

可謂朝之正人儒之君子未申殿邦之用遽齋入冥之恨
知與不知孰不嗟悼真卿黻綬祜薄門祚衰陵同生之人
零落皆盡唯形與影相視不足豈圖不造永訣於斯長號
立銘泣盡繼血其辭曰

嗟嗟予季特稟純粹曰孝與仁因心則至友由悌睦禮用
和貴蛇虵美言嶽嶽高義行絕枝葉心無頗詖經德秉彝
拔萃出類環衛入侍牽絲作尉泛愛與人檢莊莅事一作
象雷六爲天吏豪右宣威憲臺增氣羣公虛左天子思媚
守挹讓郎得仁奚媿司刑棘寺理法昭賁儲闡載升亞尹

斯位七德緊理萬人攸斂黃髮未登青雲方致云如不淑
奄忽云諱國失重寶家摧脛臂以此思哀我生奚寄反葬
何所先塋之次濱水東流終峯北摯勒名金石威烈無墜
攝常山郡太守衛尉卿兼御史中丞贈太子太保

諡忠節京兆顏公神道碑銘

公諱杲卿字昕京兆長安人也北齊黃門侍郎諱之推之
來孫隋太子校書東宮學士皇朝秦王府記室參軍諱思
魯之元孫著作郎崇賢宏文館學士贈虢州刺史諱勤禮
之曾孫高宗晉邸侍讀曹王屬贈華州刺史諱昭甫之孫

濠州刺史贈祕書監諱元孫之第二子也公方正精敏有清識周旋有則進止閒詳起家江州司法轉遂州嘗爲刺史所責公守正不爲之屈時人稱之遷鄭州司兵開元與兄春卿弟曜卿從父弟允南俱從調吏部皆以書判超等同日於銓庭爲侍郎席建侯所賞翰林拭目焉擢授魏郡錄事參軍當官正色舉劾無所迴避採訪使張守珪以清白聞遷范陽郡戶曹安祿山雅聞其名奏爲營田判官光祿太常二寺丞又請爲度支判官兼攝常山郡太守天寶十四載冬十一月祿山反范陽至橐城公與長史袁履謙

同謁乃矯授公紫履謙緋因令崇州刺史李欽湊以兵七千人守土門公罷歸途中指章服諷履謙曰與公受他此色如何履謙亦感激之士遂與公定謀翻之恐事洩潛使男安平尉泉明往來計議又使西通王承業北結賈循循敗族滅屬祿山使其心手高邈往范陽公使姪壻橐城尉崔安石密伺其歸以圖之冬十二月二十日以私號召欽湊未至會祿山害東京留守李愷中丞盧奕判官蔣清傳首脅並海諸郡前二日真卿以平原太守斬其使令外甥盧逖以購祿山敕送於饒陽常山後二日逖至公悲喜不

自勝猶未敢宣示其夕欽湊至公俾參軍李峻馮虔靈壽尉李栖默泉土人翟進玉縋於城南門密令驛長蔡行儀醉以酒而斬之履謙入告公與相持而泣喜其事之集也遂使峻栖默開土門又斬其副使潘惟慎是夜高邈迴宿蒲城公命馮虔翟進玉崔安石馳捕邈繫其肘而縛之虔領赴郡俄頃醴泉驛候騎報何千年發趙郡安石以進王馳襲而擒之如高邈遂給以榮王琬哥舒翰官軍二十萬入土門告於列郡遂使郭仲邕詐爲先鋒以中官領御騎六十徇以南諸郡於是趙郡殺賊刺史馬道貞鉅鹿殺劉

桓廣平殺郭子昂曲州殺清河太守崔審交皆以其首至
先是眞卿守平原而饒陽前聞景城樂安博平清河七郡
皆相與拒賊至是博陵上谷文安信都鉅鹿廣平魏趙鄴
與常山十郡皆卻爲國家守乃使張通幽以兄通儒相賊
乞隨泉明以自雪至太原與尹王承業同惡竊爲己功留
泉明等不遣承業從弟隨中官入奏皆蒙超獎拜公衛尉
卿兼御史中丞追赴京以履謙爲太守浚爲司馬泉明爲
左金吾兵曹制書未至春正月賊使平盧兵馬使史思明
寇諸郡思明旣來攻六日城平糧井皆竭遂爲賊所陷男

李明外甥盧逖皆遇害遂以公履謙至東京祿山讓公曰
我擢汝爲太守何負於汝而乃反乎公曰吾代受國恩官
職皆天子所與汝叨受恩寵乃敢悖逆吾寧負汝豈負本
朝乎臊羯胡狗何不速殺我乃繫公於天津橋南柱令割
肉以自噉公詢詈不已遂鉤以斷舌問更敢爾否公猶盛
氣含胡以應之還被支解而終觀者痛心焉楊國忠受通
幽詭說賈湊又不證明竟不蒙恤問乾元元年夏五月二
十八日肅宗乃追贈太子太保子姪爲賊所害者八人孫
誕姪詡先質於賊皆被鋸殺至是贈李明詡左右贊善誕

義王諮議姪子幹都水使者沛尚食奉御頗洗馬遯鄭王友從父甥博野尉沈盈大理正封夫人崔氏清河郡太夫人授泉明郛縣令男威明太僕丞姪男翽漢州司馬孫証左內倉曹訊兵曹諡公忠節從父弟國子司業允南洎真卿表謝蒙批答曰自逆胡猖狂入我河縣所在官吏多受迫脅卿兄以人臣大節獨制橫流或俘其謀主或斬其元惡當以援兵懸絕身陷賊庭傍若無人歷數其罪手足寄於鋒刃忠義形於顏色古所未有朕甚嘉之盛烈旣冠於當時寵名宜及於泉壤初公被懸首於右金吾街樹有張

湊者哀其髮收謁元宗俄見夢云禦捍處多兵馬少元宗
哭而設祭焉後湊以髮至夫人疑之憑牀而哭忽聞聲如
鞭牀者發箱跳而前夫人方駭信之明年春正月葬於京
城鳳棲原先塋西北禮也昔七代祖中丞府君慟絕於梁
武五代伯祖御正府君抗璽於隋文而公精貫白日義形
宗社今又繼之爲不隕矣嗚呼公與眞卿偕陷賊境懸隔
千里稟義莫由天難忱斯小子不死而公死痛矣哉銘曰
太保烈烈抗茲忠節殉國義形見危身殺元宗杖信售詐
凶羯寵極災挺稱兵向闕河朔鼎沸潼關晝閉天下寒心

王旆若贅蛇豕十萬萃如霜雪公以眇身毅然奮發逆黨
株送土門披抉人知効忠國用不貳恩寵三座榮加九列
王命未臨孤城已滅身縣鋒刃口詈不絕先聖感忠保儲
贈揭刻諸金石思表墓綴遠莫致之留斯江滢日月有旣
徽猷無缺

河南府參軍贈祕書丞郭君神道碑銘

夫騏驥千里之足踣於庭唐之內鴻鵠四海之志儕於墜
溲之羽此倜儻奇偉之士所爲歎息者也取之於人在於
郭君矣君諱揆字良宰太原人也郭本號叔之後春秋臬

漢細侯得政事之美有道冠人倫之目素絲作詠青溪招
隱信爲多士宜稱盛族五代祖昶隋驃騎大將軍開府儀
同三司高祖澄皇朝朔方道大總管涇鄜坊慶丹延夏七
州刺史贈荊州都督諡曰忠曾祖某朝散大夫太子洗馬
祖義朝議大夫贈鄭州刺史父虛已銀青光祿大夫守工
部尚書兼御史大夫蜀郡大都督府長史持節充劔南節
度支度營田副大使本道并山南西道採訪處置使上柱
國贈太子太師諡曰獻君生而聰明不爲戲弄之事長而
清峻罔雜綺紈之流辯對則江夏之童志意則山東之妙

大夫府君以其子氏之出故幼名封奴嘉有應務之器故
長字良宰蓋期待封宰割之義也觀其言必顧行動必由
禮讀書不取其糟粕爲仁罕忘於造次亦足以保其嘉名
楚之正則漢之臺卿乃其比也年十七崇文生明經及第
侍郎韋陟揚言於朝稱其稽古之力許其青冥之價後調
集侍郎李彭年嗟君所判足冠後生擢才子於公庭賀大
夫於私第美聲洋溢時莫與京授大常寺太祝加敬蒞事
陳信正辭每巡陵及郊必有歌詠潘河陽藉田之賦顏光
祿明祀之作復見前賢之致矣無何改授河南府參軍天

寶五載大夫總渡瀘之師緊君奉循陔之養南中污下遂
得氣疾先大夫憐其寢劇命訪秦醫太夫人懼其不起繼
自蜀至何神不禱靡藥不嘗依親自強望父增歎以天寶
八載二月十八日終於安興之私第時年二十四皇帝聞
而悼之贈祕書丞嗚呼斯人不起子丕未識亦可爲長慟
者矣君子曰夫孝弟之至絜矩之道文章之絕周旋之儀
可謂成人矣方將培雄風罩白石憐乎得二幾乎第一是
以其疾卽御醫坐門其亡卽天使歸賻陳師境上推以兩
露之私修文地下贈以蓬萊之職弔客多其文行操誅盡

於作者以五月二十一日葬於首陽鄉大塋之側君志也
先大夫懿其天姿親疏行狀敘其參元之美歎其老成之
風方崇南峴之碑以慰西門之感伏滔受遇爲人父也若
斯祈奚至公其知子也如此斯文未建頽山遂及太夫人
東海于氏淩虛墜翼間緘悼心望汝絕歸來之期抱孫有
無時之哭遂成刊刻之意以寄零落之哀銘曰

粲粲門子菲菲國香家傳玉樹人詠金相風流小褚才貌
潘郎一經自達六義名揚聞於密啓寘此周行爲子道備
從親路長旣銘絕壁亦奉垂堂霧露成病膏肓遂亡天向

京兆墳歸洛陽江堙初流水毀寒霜茫茫蔓草蕭蕭白楊
苦月墳上豐碑道傍披文相質誰不沾裳

欽定全唐文卷三百四十二目錄

顏真卿 七

唐故右武衛將軍贈工部尚書上柱國上蔡縣開
國侯臧公神道碑銘

唐故開府儀同三司太尉兼侍中河南副元帥都
督河南淮南淮西荆南山南東道五節度行營
事東都留守上柱國贈太保臨淮武穆王李公
神道碑銘

金紫光祿大夫守太子太傅兼宗正卿贈司空上

柱國隴西郡開國公李公神道碑銘

特進行左金吾衛大將軍上柱國清河郡開國公
贈開府儀同三司兼夏州都督康公神道碑銘

欽定全唐文卷三百四十二

顏真卿 七

唐故右武衛將軍贈工部尚書上柱國上蔡縣開

國侯臧公神道碑銘

公諱懷恪字貞節東莞人其先出於魯孝公之子彊字子臧大夫得祖諸侯其孫以王父字爲氏僖哀二伯旣納忠於魚鼎文武兩仲亦不朽於言哲丈人成功而遁迹子原抗節而舍生義和辭金飾之器榮緒奮陽秋之筆賢達繼軌紛綸至今曾祖滿隋驃騎將軍祖寵皇朝通議大夫靈

州都督府長史父德朝散大夫贈銀州刺史咸務遠圖克
開厥後恤允之慶世紀宜哉公卽銀州之第三子也身長
六尺一寸眉目雄朗鬚髯灑秀雅善騎射尤工尺牘沈靜
少言寬仁得衆奇謀冲邈英勇冠倫友于弟兄謹爾鄉黨
每敦詩而執禮不如柔以吐剛莅事而剖判泉流臨戎而
智略鋒起古所謂文武不墜高明有融者焉少以勳勞亟
紆戎級開元初嘗遊平盧屬奚室韋大下公挺身與戰所
向摧靡繇是發名元宗聞而嘉之拜勝州都督府長史銳
精佐理絜矩當官朔漠不空邊隅用乂俄拜左衛率府左

郎將轉右領軍中郎將兼安北都護中受降城使朔方五
城都知兵馬使戎事齊足十萬維羣我伐用張軍威以肅
由是漢爲節度使王駿所器奏充都知兵馬使嘗以百五
十騎遇突厥斬啜八部落十萬餘衆於狼頭山殺其數百
人引身據高環馬禦外虜矢如雨公徒且殲遽而給之曰
我爲臧懷恪敕令和汝何得與我拒戰於時僕固懷恩父
設支適在其中獨遮護之諸部落持疑不肯公割羊以盟
之杖義以責之衆皆感激由此獲免遂與設支部落二千
帳來歸後充河西軍前將盤禾安氏有馬千駟怙富不虔

一族三人立皆毆斃軍州悚慄疇敢不祇又爲節度相國
蕭嵩所賞後充河源軍使兼隴右節度副大使關西兵馬
使拜右武衛將軍吐蕃不敢東向者累年俄封上蔡縣開
國侯開元十二年歲次甲子春二月二十有六日薨於鄴
城之官舍享年五十六某年八月二十三日詔曰故具官
某頓以幹能亟承任使操行愈謹勞効未酬不幸遷殂良
增追悼可贈右領軍衛大將軍卽以其年冬十月庚戌遷
寔於京兆府三原縣北原禮也嗚呼公兄左羽林軍大將
軍平盧副持節懷亮以方虎之材爪牙之任孔懷斯切致

美則淡公七子游擊將軍崇仁府折衝希崇豐州別駕贈
宋州刺史希昶左武衛將軍朔方節度副使贈太子賓客
希忱右衛左郎將劒南討擊副使贈汝州刺史希愔右驍
衛郎將靜邊軍使贈祕書監希景寧州刺史左金吾衛將
軍贈揚州大都督希晏開府儀同三司行太子詹事兼御
史大夫邠寧山南觀察使集賢待制工部尚書渭北節度
使魯國公希讓等夙漸詩禮恭承教義芬潤挺蘭玉之姿
英威轡虢縹之質而希讓識度宏遠器謀沈邃仁親以孝
殿國以忠綽裕冠於人倫勲勞懋於王室至德中今上爲

元帥東伐肇允押牙從收兩京陟降左右入侍帷幄旣崇翼戴之功出擁麾幢載叶澄清之寄加以篤睦羣從紆綏宗族吉凶膽恤終始無渝行道之人孰不嗟尚肅宗以公有謀翼之勤乾元三年春三月贈魏州刺史寶應元年冬十月又贈太常卿廣德元年冬十月詔曰孝以立身可揚名於後代忠能事主故追榮而及親開府儀同三司兼御史大夫元帥都虞侯魯國公臧希讓亡父贈太常卿懷恪業茂勲賢地華簪紱佩忠信而行已包禮樂以資身守節安卑幽貞自適養蒙全正聲利不營雖與善無徵促齡悲

於逝晷而積善垂祐餘慶光於後昆故得業濟艱難功參
締構出有藩條之寄入多爪牙之任位以德遷禮宜加等
父由子貴贈合超倫宜登八座之榮式慰九原之路又贈
工部尚書褒異之典於斯爲盛臧氏自驃驍而下世以材
雄朔陞尚書旣還特以功懋當代兄弟子姪勲賢間出自
天寶距開元乘朱輪而拖珪組數百人迨於今茲繁衍彌
熾綰軍州而握兵要者相望國都有後之慶固殊異於他
族者矣眞卿早歲與公兄子謙爲田蘇之游敦伯仲之契
晚從大夫之後每接常寮之歡故公之世家竊備聞見敢

金定公集卷之二
述遺烈將無媿辭銘曰

魯史褒者臧孫有之陳魚則諫納鼎以規歿貴言立時稱
聖爲仁昭典墳知叶著龜世濟忠肅道光羽儀以至夫公
英明雄毅鶚視騰彩龍驤作氣鋒淬霜稜妙窮金匱謀猷
泉寫翰墨風駛儒勇是兼勲庸以位介馳戎馬猛奮虓虎
絕漠援孤連兵戰苦萬虜鳴鏑紛紛如雨一身抗詞諤諤
連柱精貫霜日氣雄鉦鼓狄人義激僕固誠全眇漫窮裔
隨降幾千野靜沙雪風恬塞煙我騎如雲我旗連天牧無
南向凱有北旋天子休之命侯開國謂福而壽康衢騁力

奚命之遭幽局是卽十城玉折萬里鵬息陣雲蒼蒼日暮
無色令人趨奉天眷孔明九原不作八座哀榮勇列徽範
芳時懿名里成冠蓋族茂簪纓萬古千祀瞻言涕零

唐故開府儀同三司太尉兼侍中河南副元帥都
督河南淮南淮西荆南山南東道五節度行營
事東都留守上柱國贈太保臨淮武穆王李公
神道碑銘

昔宗周之中興也時則有若方叔召虎總師干肇敏之業
南威蠻荆東截淮浦以左右宣王詩人歌之列在風雅我

皇唐之反正也時則有若臨淮汾陽秉文武忠義之姿廓
清河朔保乂王室翼戴三聖天下之人謂之李郭異代同
德今古一時公諱光弼京兆萬年人也曾祖皇左威衛大
將軍幽州經略軍副使府君諱令節祖鴻臚卿兼檀州刺
史府君諱重英父雲麾將軍左領左羽林二軍大將軍朔
方節度副使薊郡開國公贈幽州都督司空諱楷洛皆以
英果沈勇累葉將邊愴威稜於幽碣公卽薊國公之第四
子也體渾元之正性秉宏毅之高躅天子純嘏生知禮度
謨謀炳邃默識沖浚傑出經武之才鬱爲興王之佐故能

東征北伐厭難康屯挺草昧不世之功允蒼生具瞻之望
社稷威寶公之謂歟初天后萬歲中大將軍燕國公武楷
固爲國大將威震北陲有女曰今韓國太夫人才淑冠族
嘗鑒之曰爾後必生公侯之子因擇薊公配焉後果生公
公年六歲嘗撫鹿而遊薊公視而誨之曰兒勿更爾公振
手而起遂絕不爲童戲未冠以將門子工於騎射能讀左
氏春秋兼該太史公班固之學開元中起家左衛左郎將
歷豐夏二都督府長史尋遷別駕加朝散大夫丁父憂以
毀聞終喪不入妻室太夫人高明整肅有慈有威公下氣

怡聲承順而每竭其力雖已官達小不如意猶加譙讓之責故能濟其勲業天寶二年拜寧朔郡太守四載加左清道率兼安北都護仍充朔方行軍都虞侯五載充王忠嗣河西節度兵馬使加游騎將軍守右領軍賜紫金魚袋仍充赤水軍使八月襲封薊郡開國公八載遷右金吾衛將軍充節度副使以破吐蕃及招討吐谷渾加雲麾將軍左武衛大將軍十一載拜單于副都護十三載爲安思順朔方節度兵馬使思順慕公信義請爲婚姻公辭不獲免遂託疾罷官西平王哥舒翰聞而遣之奏歸京師遂守道屏

居杜絕人事十四載冬十一月安祿山反范陽天下驛騷
朝廷旰食聿求虢礪之將爰統鷹揚之師明年春正月起
公爲銀青光祿大夫鴻臚卿兼雲中郡太守攝御史中丞
持節充河東節度支度營田副大使知節度事仍充大同
軍使二月拜攝御史大夫魏郡太守充河北道採訪使俄
除范陽郡大都督府長史充范陽節度使初公以朔方馬
步八千人出土門其月旣望收常山郡前是太守顏杲卿
泉長史袁履謙殺祿山土門使李欽湊擒其心腹高邈何
千年屬太原尹王承業不出救兵杲卿履謙爲史思明所

陷戰士死者踰藉於滹沱之上公親以衣袂拂去其口上沙塵因慟哭以祭之分遣恤其家屬城中莫不感激一心史思明正圍饒陽馳來拒戰公屢摧陷之詔拜公兼御史大夫俾今尚書令汾陽王郭公子儀悉朔方之衆與公合勢南收趙郡又敗之於沙河夏六月戰於嘉山大敗之斬獲萬計思明露髮跣足奔於博陵窮蹙無計歸節於祿山祿山大恐逆徒幾潰屬潼關不守肅宗理兵於靈武盡追朔方之師加公太原尹公以麾下及景城河間之卒數千人至秋八月拜戶部尚書同中書門下平章事史思明旣

有河北之地與蔡希德悉衆來攻累月不剋而退公自賊逼城於東南角張帳次居止竟不省視妻子每過府門未嘗回顧是後決遣事務信宿方歸至德二載拜司徒冬十二月十五日肅宗旣還京師策勲換司空兼兵部尚書封鄭國公食實封八百戶公弟光進亦以懋功同制封拜乾元元年八月拜侍中其年冬十月與九節度圍安慶緒於相州明年春三月史思明至滏陽屢絕我糧道衆咸請公簡精銳以擊之交鋒竟日思明奔北於百里之外公反旆而歸烟塵亘天諸將皆以爲賊軍大至遂南渡黃河公至

則無見矣迺歸於太原是年夏五月除范陽節度使尋代
汾陽王爲朔方節度使秋八月充天下兵馬副元帥以數
千騎東巡追兵馬使張用濟會於汜水用濟獨來上謁公
數其罪而斬之因追都知兵馬使御史大夫僕固懷恩懷
恩中夜馳赴魚貫而前再宿遄至秋毫不敢犯公趣河而
東及滑州聞史思明已過河遂迎強旅以至東京移牒留
守及官吏等悉皆迴避公獨與麾下趣河陽橋城賊先鋒
已下倒懸坂公至石橋命秉燭徐行一夜方達賊望之不
敢近思明來至城下請見公公於城上謂之曰我三代無

葬地一身必以死國家之患爾爲逆虜我爲王臣義不兩全我若不死於汝手汝必死於我手將士聞之無不激勵相持凡八月思明暴露不敢入東京乾元二年冬十月甲申賊將周贄悉河北之衆萃於河陽城北思明以河南之衆頓於河陽南城之南南北夾攻表裏受敵公設奇分銳襲其虛而大破贄軍臨陣擒其大將徐璜王殺獲略盡贄僅以身免收軍資器械不可勝數思明心悸氣索烟火不舉者三日官軍大振初公以爲戰者危事勝負難必每臨陣嘗貯伏突於靴中義不受辱至是登城西向拜舞因歎

歟不自勝三軍見之無不淚下三年春正月遷太尉兼中書令其年改元上元冬十一月攻拔懷州擒其僞節度安太清二年春二月統僕固懷恩自河陽趨河清與史思明合戰於邙山屬風雨晦冥王師不利公收合餘軍屯於垣縣遂引過請罪懇讓太尉肅宗不能違之二月拜開府儀同三司中書令兼河中尹節度使夏五月十有一日復拜太尉兼侍中充河南副元帥都知河南淮南淮西山南東荆南五道節度行營事出鎮臨淮時史朝義乘邙山之捷圍逼申安等一十三州自領精騎圍李岑於宋州公之將

吏皆兇懼議南保揚州公謂之曰臨淮城池卑陋不堪鎮
遏不如徑赴彭城俟其東寇躡而追之賊可擒也遂趨徐
州因召田神功宴慰與同寢宿以宋州之難告祖道郊外
俾先飲以寵之分麾下隸於其將喬岫仍令兵馬使郝庭
玉與岫犄角而擊之賊遂一戰而走使來告捷公已屈指
俟報俄而言語至焉今上登極寶應元年夏五月進封臨
淮郡王廣德元年秋七月加實封三百戶通前後凡二千
戶賜鐵券名藏太廟仍圖畫於凌烟閣冬十一月上在陝
州以公兼東都留守制書未下久待命於徐州將赴東都

屬疾痢增劇公知不起使使齋表奉辭廣德二年秋七月
五日己亥薨於徐州之官舍初將吏等問以後事公曰吾
久在軍中不得就養今爲不孝子矣夫復何言因取已封
布絹各三千匹錢三千貫鬻麥以分遺將士衆皆感痛不
自勝及公云亡遂以其布爲公製服庚申哀問至上都上
痛悼之輟朝三日太夫人一慟而絕終夕方蘇上使開府
魚朝恩就宅敦諭京兆尹第五琦監護喪事九月己未追
贈太保十一月闕二太常議行諡曰武穆夫人薛國夫人
太原王氏泉長子太僕卿義忠並先公而逝次曰太府少

卿太僕卿象殿中丞彙等皆保家克荷備聞詩禮無忝燕
翼過庭之訓冬十一月廿七日庚申泣而咨於王母虔寔
公於富平縣先塋之東禮也於戲公以吉甫文武之姿兼
樊仲將明之德王國多難羣胡構紛藉朔方偏師之旅入
井陘不測之地思明鏗銳於恆定祿山絕望於江淮守太
原而地道設奇保河陽而雲梯罔冀破周贄於溫沈擒太
清於覃懷走史朝義叛渙之衆於梁宋救僕固瑒已危之
軍於瀛莫皆意出事外虜墜計中天下有

闕二字
闕一國
字

家無贅旒之患此皆公之力也公兄遵直遵行仕至將軍

泉弟光炎並不幸早世次曰光顏特進鴻臚卿皆以將略
見稱時輩季曰光進開府儀同三司太子太保兼御史大
夫渭北節度使涼國公清識表微沈謀絕衆剛亦不吐柔
而能立與公並時仗鉞分閫闕二字凌霄翼聖既有戴天之
功華原統師獨開禁暴之德方當會同正至榮曜君親入
侍黼帷峨二貂乎泰階之上歸聯綵服頓雙節於高堂之
下斯歡未劇遺恨何居昔斛律丞相與弟并州同務烈於
北齊賀拔行臺與兄雍州亦宣力於西魏咸稱義烈各懋
勳庸而風樹寂寞偏隅隘比之我族事則不侔真卿昔

守平原困於兇羯繫公莅止獲保餘生束帶興居空想北平之禮操觚論撰敢墜中郎之辭銘曰

羯胡猖狂俶擾皇綱降生臨淮佐我興王惟此臨淮萬夫之望爰初發迹罔或弗臧出入忠孝人倫激昂其心鐵石其行珪璋天寶末造河朔恇攘天子命公經營朔方沙河嘉山我伐用張思明歸節祿山震惶潼關勿帥醜虜其亡肅宗有命大鹵於襄應變如神兇徒靡亢介珪入覲台座用光俾公東征北國是皇長圍鄴下望入河陽擒斬渠魁霆擊龍驤淮潰鎮定徐土翱翔服田蠖屈料場鷹揚不有

神筭疇戡暴強弟兄同時秉鉞煌煌方期凱旋雙映旗常
晨趨法座夕慶高堂如何不辰愆此不祥素輶反葬白驥
跼箱簫鼓悲鳴羽儀分行萬乘致祭千官送喪生榮死哀
身歿名揚渭水川上壇山路旁唯餘豐碑突兀連岡往來
必拜萬古沾裳

金紫光祿大夫守太子太傅兼宗正卿贈司空上
柱國隴西郡開國公李公神道碑銘

昔周武以二公股肱王室然而允釐西土師保萬民者其
惟召公乎漢室以二傅羽翼儲宮然而亮采東朝儀型百

辟者其惟蕭傅乎則九德之師六行之傳親賢既美亦何
代無其人哉隴西公才爲國之垣翰位爲天之喉舌德爲
朝之元老行爲帝之信臣蓋所謂宗室之間生士林之傑
出者也公諱齊物字道用隴西成紀人自若水導其靈源
而聖人作高邱峻其層構而才子生元元爲宋帝之先興
聖有勤王之舉盛德彌於百祀靈根固於千葉太祖景皇
帝功高佐魏慶始封唐家崇八柱之勲地半三分之業亦
猶殷人之祖契周室之宗文公卽景皇帝之五代孫也鄭
王亮之元孫淮安王神通之曾孫淮安王皇朝開府儀同

三司尚書左僕射贈司空磐石開府介圭錫瑞成周之晉
鄭西漢之勃平祖孝銳鹽州刺史父璟隴州司倉贈宏農
太守並清白貽範仁賢繼軌連華公族濟美專城公稟乾
剛之正性體坤順之中德爰自岐嶷特鍾美秀儼然王公
之量鬱有台鼎之姿固已超等夷而出羣萃矣神龍初起
家左右千牛備身歷尚輦直長許州司馬華州司兵時方
振拔勢已飛騰此則江漢之濫觴華嵩之覆簣也丁太夫
人憂公有至性毀瘠過禮扶杖於家哭不絕聲者累月倚
廬於墓衣不解帶者終喪天子特降璽書就廬慰勉非常

之澤近古未聞服闕授鴻臚丞除尚輦奉御遷北都軍器
監事太原爲一都之雄鎮軍器掌五庫之禁兵故乾沒之
贓一徵百萬繕完之利費省巨億少尹嚴挺之連奏課最
擢拜長安令陸海殷湊五方浩劇公以威禁暴以恕用刑
邑里之人陶然大化遷將作少匠殿中少監太府少卿懷
陝二州刺史雖漢之宗室不典三河而周之懿親先分二
陝惟良之寄實在於公嘗以黃河經砥柱之艱有覆舟之
患遂奏疏九派鑿三門屬役而堅冰大合興功而烈火潛
熾不愆於素若有神焉人皆以公至誠之所感也又於石

獲古銘曰平陸遂以名縣焉元宗異之賜貂裘一領絹三百匹特加銀青光祿大夫鴻臚卿并公之先隴州府君專城之贈上嘗賜公玉尺一詔曰謂之尺度可以裁成卿實多能故爲此賜識者知公必將金玉王度代天之工豈惟從容九列而已拜河南尹仍水陸運使屬左相李公適之尚書裴公寬京兆尹韓公朝宗與公爲飛語所中公遂貶竟陵郡太守時陸羽鴻漸隨師郡中說公下車召人吏告之曰官吏有簠簋不修者僧道有戒律不精者百姓有泛駕蹶弛者未至之前一無所問而今而後義不相容數年

間一境丕變熙然若羲皇之代矣哀孤重老有隱逸好道者常騎馬於里巷之中親自恤問量移安康卽日上道老幼遮擁不得發者三辰轉漢陽斬春其政如一公虛中自牧接下愈恭與物盡推誠之心正身無氣餒之忌每上春行令大戶閱農輕裹餼糧重煩縣道化流江漢如時雨焉故郡歷數四課事第一去思之感人到於今稱之天寶末徵拜將作監重授鴻臚卿縱壑巨鱗還游舊浦凌風勁翮俄返故林時國忠包藏於內

下闕

特進行左金吾衛大將軍上柱國清河郡開國公

贈開府儀同三司兼夏州都督康公神道碑銘

竭誠奉主之謂忠率義忘躬之謂勇忠勇不犯則名登於
明堂子仕教忠之謂義戰陣能勇之謂孝孝慈有裕則道
存乎方冊兼此四者其惟清河公之族乎公諱阿義屈達
干姓康氏柳城人其先世爲北蕃十二姓之貴種曾祖頡
利部落都督祖染可汗駙馬都知兵馬使父頡利發墨啜
可汗衛衙官知部落都督皆有功烈稱於北陲公卽衙官
之子也正直忠鯁以信行聞爲國人所敬長於謀略工騎
射其弓十鈞年二十三爲阿史那頡佚施默啜等九可汗

宰相秉心顯一立言無二不吐剛以茹柔必蹈道而履義
可汗每有過失未嘗不極言切諫蕃落中重焉以比國家
之丞相宋璟初默啜弟拔悉密時勤嘗擊藥弒可汗公竊
而藏之密持示默啜默啜大怒將誅之公以爲請但令歸
於部落默啜知公至忠繇是益加親信同列四人莫與公
比其後公以孤直屢見疑譖遂請退歸可汗察公非罪尋
復追爲宰相先是毗伽可汗小殺爲其大臣梅錄啜所毒
小殺覺之盡滅其黨旣卒國人立其子伊然可汗無何病
卒又立其弟登利可汗華言登利猶果報也其母瞰欲谷

之女與其小臣飫斯達干預國政登利從叔父因左殺右殺東西分掌其兵馬登利與其母誘斬西殺盡并其衆左殺懼及乃攻殺登利自立爲烏蘇米施可汗拔悉密擊敗之脫身遁走國中大亂天寶元年公與四男及西殺妻子默啜之孫勃德支特勒毗伽可汗女大洛公主伊然可汗小妻余塞匐登利可汗女余燭公主及阿布思阿史德等部落五千餘帳并駝馬羊牛二十餘萬款塞歸朝朔方節度使王忠嗣具以上聞秋八月至京師元宗俾先謁太廟仍於殿庭引見御花萼樓以宴之仍賦詩用紀其事拜公

左威衛中郎將屬范陽節度使安祿山潛懷異圖庶爲已用密奏公充部落都督仍爲其先鋒使公旣不得已僴俛從之四載以破契丹功遷右威衛將軍俄拜范陽經略副使五載又破契丹功居多拜左武衛大將軍仍充節度副使元宗嘉之璽書慰勉盈溢篋笥十四載冬十一月九日甲子安祿山反范陽公以天子有命陷身凶逆舉家見質自拔莫由旣至東歸公泣血籲天次於夢寐欲與諸子逃歸國家爲賊邢州刺史康節所告遂被收繫慊奏被誅者二十餘人公之四子各奔於外賊恐衆情不安貫之而後

出至德二載闔門二百餘口被安慶緒脅至安陽屬今上
爲天下兵馬元帥統今尚書令汾陽王郭子儀朔方之師
諸節度回紇之衆東收二京公率四子及孫姪等十餘人
冒死南奔至汲郡爲從者所告家人殲焉二子歿野波英
俊挺身行前二子屈須彌施英玉持滿殿後歿野波妻阿
史那氏爲公控馬登於西山至高平界遇賊蔡希德以精
騎三百遮路邀擊歿野波英俊策馬奔之殺四十餘人生
擒四人冬十有一月七日投今上行營至焉先帝聞而嘉
之欲以開府儀同三司處公仍加實封公固辭乃受因以

爲金吾大將軍加特進增封清河郡開國公食邑三百戶

策勳

闕十
二字

衛大將軍

闕二
字

卿

闕三
字

射

闕四
字

開府儀同三司

太常卿殿前衛前射生兵馬俄加上柱國姑臧縣開國子
歿野波雲麾將軍左金吾衛大將軍上柱國射生散騎常
侍驃騎大將軍左武衛大將軍兼鴻臚卿上柱國殿前射
生使清河郡開國公英俊等官秩各有差因留公及屈須
彌施英王供奉射生以歿野波英俊勇冠三軍並令東隨
故太尉李光弼於太原後鄴郡瓦窰陣官軍與安慶緒相
逼王思禮爲其所敗賊勢旣盛太尉與思禮相顧氣索歿

野波英俊勃然奮怒遂直抵薄河當鋒擊之殺獲二千餘人賊衆方退太尉諸公覩而駭之賞雜綵百匹並以轉分麾下無所納三軍欣羨焉歿野波居常謙謹臨事勇銳戰則先鋒前無強敵捉生遊奕所向必摧九節度之圍安陽也史思明悉衆來救歿野波以十五騎過河逆擊之并馬刺倒者數人生擒數十人後擊懷州思明又自來救留爽之際侵軼柴籬歿野波領甲騎三十禦之賊軍三千人一時摧敗眞卿之棄平原也歿野波爲賊騎將緩策不追及聞渡河然始奔躡是以得脫於難平原人至今稱之英

俊瞪視眈眈姿氣雄果發勁矢持大槍巖然萬衆之中左
右馳突無不辟易而退嘗隨太尉討思明於河陽賊驍騎
萬餘於中闔城索鬪將莫敢應者英俊挺身奔擊之應槍
落者二十餘人英俊被槍刺頰貫喉而出擺首而去之猶
殺二人而還太尉壯焉遂以從父兄子妻之故天下之言
勇者以歿野波英俊兄弟爲稱首廣德元年上幸陝州公
之諸子皆當扈從公以體貌瓌碩難於舉動方與之死訣
歿野波妻爲公介馬扶奔華州公慮不免謂左右曰我若
爲賊所得無累我兒子乎汝曹何不殺我衆人感懼叫然

皆哭遂竭力舁公至於行在上淡嗟賞之方極尊榮以終
宴喜上天不惠以二年青龍甲辰冬十有一月二十日甲
寅感肺疾薨於上都勝業坊之私第春秋七十有五親事
左右莫不撝面截耳以哭初凌霄之難公實援立漣水之
屯公親總統上之反正父子從焉帝疇厥功遂有開府儀
同三司兼夏州都督之贈夫人清河郡太夫人交河石氏
左衛中郎將珍之孫左金吾衛大將軍三奴之女溫敏淑
惠柔明端雅有女師母儀之德克懋於家不幸遘疾以天
寶十五載春三月八日先公而薨永泰元年春二月十日

壬申與公合祔於萬年縣之長樂原禮也嗚呼公以沈果
之姿抗英威之志降精昴宿炳粹天街忠肅表於生知義
勇形於造次屬國家多難淪胥以痛壯一心而來事我君
貫四時而不改柯葉義方懇到相攜於契闊之中臣節激
昂三見於危亡之際天子感焉旣受腹心之託禁旅資焉
俱列爪牙之地勳庸克茂聲問攸歸叢綵衣於玉帳之前
羅五戟於一門之內不其盛矣昔蕭相國舉宗佐命金日
磾七葉珥貂望古儔今可謂同德其孤等窮人孺慕靡所
寘哀聿求不腆之辭庶播無疆之美銘曰

北方之強歟十有二姓強哉矯部落之雄者康執兵柄緬
乎眇特進誕生兮實登邦政德不擾嗽女滅國兮烏蘇不
竟愠羣小三濱九死兮舉族致命丹心皦一門萬石兮彰
厥誠敬皇恩瞭生爲忠臣今後有餘慶其不天家有孝子
兮嚴親翊聖王之爪乃立豐碑兮百代遺詠鴻名表忠孝
之際兮於斯爲盛遠圖宵